



Ilis rendaints 2020 da las vischnancas grischunas èn per gronda part positivs e la summa d'investiziun considerabla.

FOTO DAVID TRUTTMANN

Las bleras vischnancas stattan sin in bun fundament

La plipart dals quints communalis 2020 preschentads las emnas passadas dattan in maletg positiv da las finanzas communalas, cun excepziuns. Enfin uss n'ha corona betg influenzà fitg las cassas communalas

ANDREAS CADONAU/FMR

«Per plaschair stattan las vischnancas grischunas tut en tut sin in fundament finanziel solid». Il schef dal Uffizi chantunal da vischnancas, *Thomas Kollegger*, ha ditg che la plipart dals rendaints communalis 2020 preschentads enfin uss conferman la situaziun stabila. Uschia che corona n'ha, almain enfin uss, betg influenzà negativ las finanzas communalas. Thomas Kollegger ha dentant fatg attent che buns resultats annuals possian avair divers motivs. «L'egliada sin la singula vischnanca e sin il singul cas è impurtanta.» In cas singul è per exempel la vischnanca da Ilanz/Glion che ha preschentà dacurt ses meglier quint dapi la fusiun. Per *Rolf Beeli*, responsabel da l'administraziun communalala per las finanzas, è quai d'attribuir al fatg che la vischnanca ha tegnì en egl las expensas. «Da l'autra vart èn las entradas da taglia da las persunas naturalas creschidas.» Tenor *Rolf Beeli* èn dapli persunas sa chasadas en vischnanca e tranter quellas era buns pajataglias.

Entradas stagneschan

E gist las entradas da taglia stagneschan tar la vischnanca Val Müstair, sco quai ch'il chanzlist

Not Manatschal ha explitgà. Il resultat dal quint communal 2020 na cuntenta betg, e betg ex-num pervi dal deficit dal quint current da bunamain 300 000 francs. Il grad da l'atgna finanziaziun è crudà sin 2,07%, quai che la vischnanca valitescha sezza per insufficient. Ideal è in grad d'atgna finanziaziun da 100%. Enfin 80% valitescha il chantun anc per bun. «Nossa vischnanca stuess nudar in cashflow da cira 1 milliun francs per pudair financiar a lunga vista las investiziuns ord atgna forza e da quai essan nus lunsch davent.» *Not Manatschal* ha ditg che la vischnanca pondereschia da spargnar.

Spargnar n'è betg simpel

Spargnar n'è betg simpel tar las vischnancas cun blera infrastruttura che sto vegnir mantegnida. E per regla è la plipart da las expensas communalas liada nà da la lescha chantunala. «Eventualmain stuain nus auzar la taglia sin immobiglias.» La vischnanca da Val Müstair ha ina taglia d'immobiglias da 1 promil, plitost bass cumpareglia cun autras vischnancas. Percunter sa chatta il pe da taglia sin 120% da la taglia chantunala simpla. *Rolf Beeli* da la visch-

nanca da Glion è da l'avis che las entradas da la vischnanca sa sviluppeschan positiv. «L'onn proxim vegnan las immobiglias en la vischnanca Ilanz/Glion validadas da nov da l'Assicuranza d'edifizis.» Per regla porta la validaziun nova dapli entradas da taglia.

Mumentan intschert

L'influenza da corona sin las finanzas communalas è mumentan anc intscherta, sco quai che *Thomas Kollegger* ha ditg. «I dependa co la pandemia sa sviluppescha e co l'economia naziunala ed internaziunala po sa revegnir.» Il schef da l'Uffizi da vischnanca manegia che las expensas socialas vegnian a crescer tar intginas vischnancas e las entradas da taglia a sa reducir en consequenza da concurs u dischoccupaziun. Per part po la gulivaziun da finanzas dal chantun gulivar sperditas finanzielas da las vischnancas. *Not Manatschal* na vesa mumentan betg ina influenza negativa directa da corona sin las finanzas communalas. «Mancanzas finanzielas tar chantun e Confederaziun pudessan sminuir ils daners per gulivar las finanzas tranter Confederaziun e chantun e chantun e vischnancas.»